

Oseas

Imaginá ku bo ta kasá ku e persona di mas presioso den henter mundu. Bo ta sumamente felis kun'é. Bo ta gusta invertí tempu p'é, ta stim'é di kurason.

Ma un dia bo bida felis ta kibra na wèrki na un forma abrupto. Bo ta haña sa ku bo kasá ta kòrta bo orea—kuchi kuchi e tin un amante pa basta tempu. Bo kurason ta kibra na mil pida. Maske bo ta despuesto pa pordon'é, kos ta bai di malu pa pió. Bo esposa ta sali trankil ku su amante bo dilanti. Bo ta papia kun'é, ta hasi orashon p'é, ta aktua ku stimashon pa kun'é; ma ketu bai e ta ku su amante. Bo ta hasi mas esfuerso pa ta un bon esposo. Bo hasi kos spesial p'é. Ma su adulterio ta sigui trankil manera nada n' pasa.

Un dia e ta hisa bela, bai lagabo. Despues di tempu bo ta tende ku e tin *vários* amante. Bo ta bin haña sa ku e ta hiba un bida di paranda i inmoralidat formal. Di bèrdat, el a yega asina leu ku el a bira un prostituta.

Kon lo bo sintibo?

Buki di Oseas ta skirbí pa pueblo di Dios por sa kon E ta sinti ora Su pueblo ta rechas'E, bandon'E, kòrta Su orea spiritualmente!

Dios a prepará un hòmber spesial pa komuniká Su stimashon, misericòrdia, kariño i gracia apesar di e infieldat di Su pueblo. E hòmber ku El a prepará tabata Oseas.

I. OUTOR DI E BUKI

Oseas (HOSHEA na idioma hebreo) ta nifika “salbashon”, “ayudo” òf “liberashon”. Tantu e nòmber Hosué komo Hesus (YESHUA) ta originá ku e number HOSHEA.

Ta importante pa kòrda ku Oseas ta nòmber di diferente persona den Beibel. Por ehèmpel, Oseas tambe tabata nòmber di último rei di Israel (732-722 B.C.). Probabelmente rei Oseas i e profeta Oseas a biba na e mésun tempu. Ma kòrda, nan ta dos persona distinto.

Kiko nos sa di Oseas? Tur loke nos sa di Dios Su profeta, nos ta siña for di su buki...i esei no ta hopi. Nos sa nada di Oseas su nasementu, siudat unda el a biba, ni na kua tribu el a pertenesé.

Probabelmente Oseas tabata un habitante di Israel, e pais di nort. Si esei ta e kaso, anto Oseas ta e úniko profeta-suidadano di Israel ku a skirbi un buki di Beibel ku a dirigí su ministerio pa ku Israel. (Algun otro profeta ku tabata habitante di Israel, ma no a skirbi un buki di Beibel, tabata Elias i Eliseo.) Un eskritor a deskribí e buki di Oseas komo “e stèm profétiko trosé for di bus di e reino mes.” E buki di Oseas ta duna algun indikashon ku Oseas lo tabata un suidadano di Israel. Oseas a papia di rei di Israel komo “nos rei” (7:5). E pais di Juda ta mensioná, ma djis di paseo. Ademas, segun ekspertonan di idioma, e linguahe ku Oseas a usa ta indiká ku su idioma hebreo ta kontagiá ku e idioma arameo. Ta mas lógiko ku esei lo sosodé ku un habitante di Israel, lokalisé pegá ku Siria unda nan a papia arameo, ku lo tabata e kaso ku un habitante di Juda, situá suit di Israel.

Loke ta REGARDÁ nòmbernan di famianan di Oseas, nos tin bastante informashon. Nòmber di Oseas su tata tabata Beerí (1:1). Talbes e echu ku su tata ta mensioná den e buki ta indiká ku e

tata tabatin siertu status sosial. Oseas su esposa tabata Gomer (1:3). Asta nos sa number di suegro (òf talbes suegra) di Oseas, Diblaim (1:3). Beibel tambe ta menshoná nòmber di tres di su yunan: Jezreel (1:4), Lo-ruhama (1:6) i Lo-ammi (1:9).

Nos no sa kiko tabata Oseas su ofishi promé ku Dios a yam'é pa bira un profeta. Ma ta notable ku Oseas a usa diferente ehèmpel for di agrikultura i talbes bida di kunukero (2:6; 4:16; 6:4; 8:7; 9:1; 10:12; 12:11; 13:3). Esaki por indiká ku e tabata un kunukero, òf talbes a lamta na kunuku. Otronan ta kere ku e profeta tabata desendiente di e famia saserdotal na Israel, debí ku el a menshoná e saserdosia tantu biaha.

Probabelmente Oseas no a haña edukashon formal na un skol di profetanan. Su skirbimentu sinembargu ta indiká ku e ta un hende ku konosementu di hopi kos. Nada ta konosí tokante Oseas su yamada pa ku e ministerio.

Den 1:1, Oseas a duna di konosé algu tokante e fecha di su ministerio. El a profetisá durante reinado di e siguiente reinan:

REINAN DI JUDA	REINAN DI ISRAEL
Uzias (792-740 B.C.)	Jeroboam (793-753 B.C.)
Jotam (750-731 B.C.)	
Akaz (735-715 B.C.)	
Ezekias (715-686 B.C.)	

Probabelmente Oseas a kuminsá profetisá durante último añanan di Jeroboam II. (Tantu e reinan di Juda, Jotam, Akaz i Ezekias a reina despues di reinado di Jeroboam II.) Si esei ta e kaso, Oseas lo a sigui su ministerio durante reinado di seis otro rei di Israel: Zakarias, Salum, Menahem, Pekaia, Peka, Oseas. Pusibelmente fecha di Oseas su ministerio por tabata entre 754-714 B.C. Tin studiante di Beibel ku asta ta kere ku Oseas su ministerio a dura 72 aña.

Den un sintido por bisa ku Oseas tabata susesor di Amos. Amos tabata profeta pa ku Israel promé ku Oseas. Kisas tabatin un lapso di tempu ku nan a sirbi Señor durante e mésun periodo di tempu. Nos no sa si nan tabata konosé otro. Esei por tabata e kaso, ma Beibel no ta duna indikashon. Sinembargu, kasi sigur Oseas tabata sa di ministerio di Amos. Amos tabata mas grandi ku Oseas. En kontraste di Oseas, ku tabata un suidadano di Israel ku a profetisá pa ku su mes paisanonan, Amos tabata habitante un di Juda ku a profetisa na Israel.

Talbes ta bon pa pouza i kompará e dos profetanan. Amos a papia manera dònder, kondinando piká. En kontraste, e karakter di Oseas su ministerio tabata muchu mas suave. El a papia ku suavidad; e tabata un profeta sensible i kariñoso. E ta yama “e profeta ku kurason kibra.” Amos a dirigí su palabranan pa ku konsenshi di Israel, mienstras Oseas a enfatisá emoshon. Amos a interpretá e lei di Dios; Oseas a enfatisá e amor di Dios. Amos tabata impreshoná ku e rektitut di Dios; pa Oseas, tabata amor divino ku a hala su atenshon. Oseas a skirbi na un forma mas poétiko; mientras Amos tabata mas bòt i lógiko.

Otro koleganan profeta kontemporaneo di Oseas lo tabata Isaias i Mikeas, profetanan na e pais di Juda. Dor ku e ministerio di Oseas tabata na Israel, nos no sa si nan tabata konosé otro.

Oseas su tarea tabata pa roga puebel di Israel pa bolbe na nan Dios. Ma nan a nenga repintí i komo konsukuensia nan a wòrdu kastigá severamente!

Maske su mensahe a wòrdu ignorá, Oseas no a frakasá komo un profeta. E tabata obedesido na Dios i a proklamá e mensahe di Dios! E aplikashon pa nos era ta masha visto. Hopi biaha kreyentenan ta kere ku *eksito* ta loke ta importante. Nos ta kere si un kreyente ta konta un otro persona di Kristo, i e persona no ta hasi desishon pa konfia Hesus pa salbashon, e kreyente a frakasá. Esei no ta bèrdad! Nos ta kere ku un pastor bendishoná di Señor lo tin un iglesia yen di hende. Esei tambe ta mentira. *Dios no ta yama kreyentenan pa ser eksitoso pa bista di hende.* E ta yama hòmbènan i muhénan di Dios pa simpelmente ta *fiel!* I echu ta, si bo ta fiel na Dios, bo ta un eksito den Dios Su bista apesar di kuantu frakaso bo por tin mirá di punto di bista humano.

Vários profeta a profetisá di e kastigu di Dios pa ku Israel si nan no bolbe n'E. Ma Oseas

tabata e último profeta di Israel pa skirbi promé ku kaída di Samaria na 721 aña promé ku Kristo. Su ministerio tabata durante e tempu ku Israel ya kaba a degenerá spiritualmente i moralmente na un nivel ku no tabata pusíbel pa evitá Dios Su huisio mas.

Oseas tabata e último profeta promé ku—i durante tempu di—e kastigu di Señor. (Lesá 2 Reinan 15-17 pa haña un bista di loke tabata sosodé durante Oseas su ministerio.) El a sirbi Señor fiel durante tempu ku Asiria a invadí Israel. El a profetisá ora nan a konkistá, destruí i deportá Israel for di su tera. Komo resultado Oseas ta yamá e Jeremias di e reino di nort.

Maske Oseas probabelmente a kompletá su buki promé ku kaída di Samaria, tantu Jeremias komo Oseas a skirbi e mesun tipo di mensahe. Nan tur dos tabata “profetanan ku ta yora”. Loke Jeremias tabata pa ku Juda, Oseas tabata pa ku Israel. Oseas tambe ta yamá “e Jeremias di Samaria” pa motibu di e similaridat di nan ministerionan.

Beibel no ta indiká kiko a sosodé ku Oseas ora Asiria a konkistá Israel. Tin spekulashon ku Oseas a bai Juda komo un refugiado, hibando su skirbimentunan profétiko huntu kun’ é.

II. LEKTORNAN DI E BUKI

E buki di Oseas ta dirigí prinsipalmente na e pais nort, Israel. Ma no eksklusivamente. Tin spiertamentu okashonal pa Juda tambe (p.e. 4:15; 5:5).

III. ERA I FECHA DI E BUKI

A. ERA DI E BUKI

Kon por deskribí e era ku e buki di Oseas a wòrdu skirbí?

1. Instabilidat i violensia polítiko

Despues ku rei Jeroboam II a muri, a bin un era di anarkia, intrankilidat, rebelion, instabilidat i violensia. Fásilmente e echu aki ta sali na kla ora nos ta pensa tokante e último reinan di Israel:

Jeroboam II – reina 40 aña (793-753 B.C.)

Zakarias -- reina 6 luna – Salum a asesin’ é (753-752 B.C.)

Salum – reina 1 luna – Manahem a asesin’ é (752 B.C.)

Manahem – reina 10 aña – morto natural (752-742 B.C.)

Pekaia -- reina 2 aña -- Peka a asesin’ é (742-740 B.C.)

Peka -- reina 20 aña – Oseas a asesin’ é (752-732 B.C.)

Oseas – reina 9 aña – kaptura pa Asiria (732-722 B.C.)

Nos ke hala atenshon na tres opservashon. Ripará durashon di e reinadonan despues di Jeroboam II. Un rei so a reina mas ku dies aña, Peka. Tres rei a ni reina tres aña: Pekaia, Zakarias i Salum. Tambe ta notable ku solamente dos di e reinan (Zakarias i Pekaia) tabata yu di e rei anterior. Pues, kasi no por papia mes di dinastia. Esei ta trese nos na e punto prinsipal. Kuater di e último seis rei a wòrdu asesiná. Klaramente e periodo di tempu ku Oseas a profetisá tabata un tempu di instabilidat i violensia polítiko.

2. Dekadensia moral

Rei Joas a logra derotá Siria tres biaha den kampañanan military (2 Reinan 13:25), librando Israel for di opreshon di parti di otro paisnan. Su yu, Jeroboam II, a sigui ku ekspanshon militar i polítiko. Komo resultado, Israel a prosperá ekonómikamente durante ministerio di Oseas, espesialmente durante era di Jeroboam II. Di bèrdat, reinado di Jeroboam II ta konosí komo e era di oro di Israel.

Ma esaki tambe tabata un era di dekadensia, abuso, korupshon, inhustisia i immoralidat. Entre otro, Israel a adorá Baal. Un parti di e adorashon di Baal a inkluí relashon seksual ku un di e saserdotenan di Baal, prostitutanen femenino òf maskulino. E situashon ya kaba tabata malu den dianan di Amos. Ma Israel su maldat tabata muchu mas pió den era di Oseas. E “profeta ku kurason kibrá” a mensioná diferente piká di kua Israel tabata kulpabel, demonstrando ku nan tabata leu di Dios:

Huramentu falsu - 4:1-2

Matamentu i dramamentu di sanger - 4:2; 5:2; 6:8

Saserdotenan bandido – 6:9; 7:1

Adulterio - 4:2,11; 7:4 (inmoralidat tabata un rito di nan religion – 4:13-14)

Engaño – 10:4; 12:7

Idolatria - 4:12-13; 8:5; 10:1,5; 13:2

Buracheria - 4:11,18; 7:5

Ignorá Dios - 4:10; 8:14

3. E situashon internashonal

Durante era di Oseas, tabatin dos nashon poderoso: Asiria i Egipto. Israel tabata lokalísá meimei di nan dos. Israel no tabata un nashon poderoso mas manera tabata e kaso ora Jeroboam II tabata rei. Israel no por a konfia su mes abilidad militar kontra super-potensianan asina. Pesei nan a purba forma aliansanan un òf otro di e potensianan grandi.

Algun rei di Israel a favoresé un aliansa ku Asiria pa defendé nan kontra Egipto mientras otronan a favoresé un aliansa ku Egipto. Pesei 7:11 ta bisa, “Efrain a bira manera un palomba bobo, sin tino; nan ta yama na Egipto, nan ta bai Asiria”. Un komentarista a bisa, “Efrain ta un palomba bobo, ta bula aki aya...tur kaminda ku eksepsion di bula den direkshon di Dios.”

B. FECHA DI E BUKI

E profesianan den buki di Oseas a wòrdu duná na diferente periodo di tempu. Ta parse ku 1:4-5 tabata skirbí durante dinastia di Jehu ku a terminá ku Zakarias (752 B.C.). E ta un profesia ku dinastia di Jehu lo kaba. Probabelmente e profesia aki tabata duná promé ku Jeroboam II a muri (753 B.C.). Aparentemente kapítulo 5 tabata dirigí kontra rei Manahem (752-742 B.C.). I talbes kapítulo 7 ta un profesia ún dékada despues, tokante rei Oseas (732-723 B.C.). Por nota tambe ku e huisionan di Dios ta prognostiká, ma ta skirbí komo sifuera nan sosodé kaba.

Pues, por bisa ku e buki ta inkluí partinan di sermonnan duná durante un periodo di 25 aña. Pues kisas nos por konkluí ku Oseas a skirbi su buki mas òf ménos na aña 725 B.C.—talbes 30 aña despues ku Oseas a kuminsá prediká.

IV. STRUKTURA I KONTENIDO DI E BUKI

Mas òf ménos dos shen aña anterior, dies tribu di Israel a establese un reino apart for di Juda. Nan a yama e reino di nort, Israel. Inmediatamente nan a kuminsá adorá ídolonan. Dios a manda vários profeta pa yama nan pa regresá n'E. El a manda Elias i Eliseo. Ma nan a nenga skucha. Un otro profeta tabata Amos. Awor, atrobe, Dios a manda un otro profeta, Oseas. E profeta aki a supliká Israel pa bolbe na SEÑOR.

Loke ta úniko di e buki di Oseas ta ku e profeta mester a biba su mensahe promé ku e por a predik'é! Dor di e doló ku el a eksperensia den su mes kas komo resultado di e piká di su esposa, e por a komprendé mihó e doló ku Dios a sinti pa ku Su pueblo. I Dios a usa e eksperensia di Oseas komo un mensahe visual pa e pueblo di Israel pa yama nan bèk serka djE.

E promé tres kapítulo di Oseas ta konta e storia. (En kontraste, e siguiente 11 kapítulo ta predikashi.) Nos lo purba haña un bista di e storia di Oseas den e buki.

Oseas a kasa ku Gomer (1:2-3a). Oseas su stimashon p'é tabata bèrdadero i puru. E lo a antisipá añanan di felisidat huntu. El a duna Gomer un kas, su number, su reputashon, su amor bèrdadero. Nan a haña nan promé yu, un yu hòmber, Jezreel (1:3b-5). Jezreel tabata un nòmber profetiko, ku Dios lo kastigá Israel. Ta parse ku despues ku Jezreel a nase, Gomer a bira un prostituta. Gomer a haña un otro yu—yu muhé—Lo-ruhama (1:6-7). Lo-ruhama ta nifika “e no a haña kompashon” òf e por nifiká “no stimá”. E teksto ta indiká ku Lo-ruhama no tabata yu di Oseas. Den 1:3, ta bias di e promé ku Gomer a “haña un yu hòmber p'é”. Esei no ta bisá di e siguiente yunan. Ademas 2:4 ta bias di e yunan ku “nan ta yunan di prostitushon”. Gomer a haña un di tres yu—un yu hòmber (1:8-9). Lo-ammi, nòmber di e yu, ta nifika “no mi puebel”. Ta parse ku Lo-ammi tampoko tabata yu di Oseas.

Oseas i Gomer a separá for di otro, i Gomer a sigui ku su prostitushon. Beibel no ta

indiká ken a inisiá e separashon. Ta parse ku Gomer a laga Oseas ku tres yu chikitu. Ma de todo kaso, despues di tempu Gomer a hañ'é ku problema finansiero. Pasobra e no tabatin sèn pa paga su debe, e mester a bende su mes komo un katibu. Ma apesar di tur e pikánan mahós di Gomer, Oseas a sigui stim'é. Esaki ta amor ku “tin pasenshi...no ta buska su propio interes...tur kos e ta suportá” (1 Korintionan 13:4-7). Konsekuentemente, ora Oseas a mir'é na marshe unda nan a bende esklabu, Oseas a kumpra Gomer (3:1-3).

Imaginá e emoshonnan di Oseas den tur esaki. Apesar di su stimashon pa su esposa, tòg Gomer a insistí pa namora otro hòmber. Su immoralidat, adulterio, infieldat, prostitushon i ken sa kiko mas lo a kibra Oseas su kurason.

Kada bes, kapitulonnan 1-3 di Oseas ta splika kon e storia ta apliká na e relashon di Dios pa ku Israel. Den e storia, Oseas a representá Dios, Gomer a ilustrá Israel, i e yunan a representá e hendenan di Israel. Méskos ku Gomer a kometé adulterio, Israel a bai tras di adorashon Baal, loke a enserá aktonan immoral-religioso.

E profeta a bin komprende adulterio i prostitushon spritual. Israel, esposa stimá di Dios, a kometé adulterio spritual dor di bai tras di diosnan falsu, bandonando e Dios ku a stima nan. Pesei Dios lo laga nan bai den kaptividat. Ma apesar di nan infieldat pa ku Dios, tòg El a warda ku pasenshi pa nan bolbe serka djE. I ora nan repintí, E lo tuma nan bèk (3:4-5).

Kòrdando e storia aki, no ta straño ku algun estudiante di Beibel ta yama Oseas “e profeta ku kas kibrá”. Dor di e eksperensianan trágiko di Oseas su matrimonio, e pueblo di Israel por bin komprende kon teribel Israel su piká kontra Dios ta. Nan por a komprende ku meskos ku Gomer su adulterio a kibra Oseas su kurason, di igual manera, Israel su adulterio spritual a kibra Dios Su kurason. E kapitulonnan biográfiko (1-3) ta pone fundeshi pa e sermonnan di 4-14.

Oseas 1:2 ta presentá un problema relashoná ku e storia di Oseas i Gomer. E problema ta Dios Su instrukshon na Oseas: “Bai, tuma pa bo mes un esposa prostituta...” E pregunta ta: Dios lo instruí su profeta pa kasa ku un prostituta? Talbes esei ta e kaso. Maske Dios a prohibí saserdotenan di kasa ku un prostituta (Levítico 21:7,14), esaki no a apliká na profetanan. Ademas, e ta ilustrá mas kla Dios su relashon pa ku Su pueblo infiel. “Ma Dios ta demonstrá Su mes amor pa ku nos den esaki, ku tempu nos tabata pekadó ainda, Cristo a muri pa nos” (Romanonan 5:8).

Ma tin un otro splikashon. Sin duda Oseas a skirbi e buki *despues* di su eksperensia marga. Pues, e por a kasa ku un dama ku tabata puru, ma despues a bira un hende immoral. Skirbiendo di esaki despues, por komprende Dios Su instrukshon na Oseas den 1:2: “Bai, tuma pa bo mes un esposa” (ku for di perspektiva di Oseas tempu ku el a skirbi e buki a bira un “prostituta...”

Talbes e siguiente skema lo duna un bon bista di e buki:

- I. OSEAS SU MATRIMONIO KU GOMER – 1-3
 - A. Yunan di Prostitushon – 1:1 – 2:1
 - B. Gomer Su Infieidat – 2:2-23
 - C. Oseas Su Fieldat – 3:1-5
- II. OSEAS SU MENSAHE PA KU ISRAEL – 4-11
 - A. Israel Su Ignoransia i Infieidat – 4:1 – 6:3
 - B. Israel Su Huisio – 6:4 – 10:15
 - C. Jehová Su Fieldat di Amor pa ku Israel – 11-14

E siguiente skema ta un otro perspektiva kon e buki di Oseas ta organisá:

- I. PRÓLOGO ILUSTRATÍVO PERSONAL - 1-3 (storia)
 - (Esaki ta un sekshon personal...e esposa adúltera i e esposo fiel.)
 - A. Matrimonio – 1
 - B. Separashon – 2
 - C. Regreso - 3

II. MENSAHENAN PROFÉTIKO NASHONAL - 4-14 (sermonnan)

(Esaki ta un sekshon nashonal...pueblo adúltero i Dios fiel.)

A. Dios ta Santu - 4-8 (Israel su piká ta insoportabel)

Den e sekshon aki, piká i kulpa ta prominente.

B. Dios ta Hustu - 9-10 (Israel lo wòrdu kastigá)

Huisio ta e lema prominente den e sekshon aki.

C. Dios ta Amor - 11-14 (Israel lo wòrdu restorá)

Den kapítulonon 11-14, speransa ta e lema prominente.

Kapítulonon 11-14 di Oseas ta yen di e amor, kompashon, i grasia di Dios (11:1,4,8-11; 13:14; 14:4,6). E kapítulonon aki ta muestra e *triúnfo* di stimashon. Finalmente, Dios Su stimashon lo vense ora Israel ta bolbe n'E den e último dianan.

V. OPSERVASHONAN DI E BUKI

A. STAIL DI E BUKI DI OSEAS

Nota diferente punto ku ta destaká relashoná ku e manera ku e profeta a skirbi su buki:

- Oseas a skirbi ku hopi emoshon. E buki ta skirbí manera un hende ku kurason kibrá ta skirbi, espesialmente Oseas 4-14. Ta difísil pa forma un skema di e ultimo 11 kapítulo di e buki. Segun Robertson, “E frasenan ta kai manera lágrimanan di un kurason kibrá.” Ya kaba nos a nota ku algun studiante di Beibel ta yama Oseas “e profeta di kurason kibrá”.

- Ta parse ku kapítulonon 4-14 ta un kompilashon di sermonnan sin tene kuenta ku skema.

- Oseas tambe a usa hopi símbolo. Sin duda, esun prominente den e buki ta matrimonio (Oseas 1-3).

- Graham Scroggie a deskribí contenido di e buki, “Su mensahe ta un di esnan mas profundo i spiritual di Tèstament Bieu.”

- Oseas por skirbi ku un tono outoritario tin ora. Ma e ta usa “SEÑOR a bisa” (1:2,6,9; 3:1).

B. PALABRANAN KU TA DESTAKÁ DEN E BUKI DI OSEAS

Tambe ta bon pa ripará algun palabra ku ta destaká den e teksto mes di e buki. Oseas a skirbi klaramente tokante Israel. El a usa e palabra “*Israel*” 44 biaha den su buki. Tambe el a usa e nòmber “Efrain” (37X) pa referí na henter e nashon di Israel debí ku Efrain tabata e tribu mas grandi di Israel. Ma Oseas no a lubidá Juda, e pais suit di Israel. Juda ta mensioná 15 biaha.

Ripará algun otro palabra interesante den e buki. Papiando tokante Dios Su akshon, Oseas a usa “lo Mi” 54 bes. Oseas a papia ku frekuensia tokante repintimentu. El a usa e palabra “bolbe” (15X) na lugá di repintí (3:5; 6:1; 7:10; 14:1). Tambe e palabranan “konosé” i “konosementu” (13X) ta destaká den e buki. Oseas a pone énfasis riba konosementu di Dios, méskos ku apòstel Juan a hasi hasi den su buki di 1 Juan. E profeta a referí na un konosementu personal ku Dios...un relashon personal. P’esei, bes tras bes el a laga sa ku “nan no konosé SEÑOR” i a reta nan pa “konosé SEÑOR” (2:20; 4:1,6; 5:4; 6:3,6; 8:2; 13:4).

C. LEMA DI E BUKI DI OSEAS

Nos por usa diferente palabra òf frase pa deskribí e mensahe di e buki di Oseas. Algun di e palabranan ei por ta: piká, kastigu, infieldsat, stimashon, restorashon i rekompensá dor di pordon i grasia.

E buki di Oseas ta kontené diferente énfasis. Oseas su lema prinsipal ta e huisio di Dios. Sinembargo nos ta kòrda e buki di Oseas mas tantu pasobra e ta enfatisá Dios su stimashon, kariño i grasia!

Apòstel Juan ta konosí komo e apòstel di amor den Tèstament Nobo. Por yama Oseas e profeta di amor den Tèstament Bieu. Por nota kla Dios Su stimashon pa esnan ku a desviá di djE (2:14-15,19-20; 3; 11:3-4,8). Oseas a rekordá Israel di Dios Su stimashon pa nan den era di e

patriarkanan (12:2-6) i na tempu di e èksodo (11:1-4; 12:9; 13:4).

Un otro mensahe ku ta sali kla den e buki ta: e Dios di stimashon ta ofresé Su puebel infiel i kasbesura su último chèns pa restorashon. E buki di Oseas tabata un yamada di Dios pa Su pueblo regresá n'E (6:1). Den e buki Dios a roga “Bolbe, O Israel, serka SEÑOR bo Dios...” (14:1). Ta masha visto den e buki ku piká no solamente ta kibramentu di Dios Su lei; piká tambe ta kibramentu di Dios Su kurason.

E aplikashon pa nos awendia tambe ta mas kla ku di dia. No ta importá kon leu un hende a dwal for di Dios. Dios ta stim'é i ta yam'é pa bo bolbe serka djE. Studiando e buki di e profeta ku kurason kibrá, nos por komprendé mas mihó kon Dios ta trata ku pekadornan.

VI. PROPOSITO I MENSAHE DI E BUKI

Ku tur esei en bista, nos ta yega na proposito i mensahe di e buki. Gomer tabata infiel pa ku su esposo, Oseas. Señor a usa e ehèmpel di e bida personal di Oseas pa mustra Israel ku nan ta igualmente infiel pa ku nan Dios. Proposito di e buki ta pa konvensé pueblo di Israel ku nan mester repentí i regresá na nan Dios. I méskos ku Oseas tabata despuesto pa pordoná i aseptá su esposa traishonero bèk, igualmente Dios ta yen di stimashon i pasenshi, ta kla pa pordoná esnan ku ta repintí. Den e buki, Dios a usa tantu menasa komo promesa pa roga Su pueblo pa regresá n'E.

Literatura Konsultá

Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 327-330.

Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 89-104.

Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 109-110.

Douglas, Alban, *Old Testament Survey*, anotashon di lèsnan na Prairie Bible Institute (Three Hills, 1983), p. 85.

Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 357-364.

Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 392-396, 411-418.

McGee, J. Vernon, *Thru the Bible notes*, p. 255-256.

Mears, Henrietta C., *What the Bible is All About* (Minneapolis: World Wide Publications, 1966), p. 275-283.

Miller, Adam W., *Brief Introduction to the Old Testament* (Anderson, Indiana, Warner Press, 1964), p. 99-105.

Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).